

Ebbaluṅa eyohubiri eyi Pawulo gaṅandiihira Abakoriiso Enyanjula

Pawulo omuhwenda wa Yesu nj'owanandiiha ebbaluṅa eya *Bakoriiso* eyohubiri. Bateberesa baati gayiṅandiiha ṅagati w'ataanu n'etaanu n'ataanu namukaaga oluvanyuma lw'ohusaaliwa hwa Kurisito. Yino nj'ebbaluṅa eyohubiri eyi Pawulo gaṅandiihira Abafugiirira Kurisito abomu hibuga Koriiso. Naṅuma ebbaluṅa eyi alomaho mu 2:3-4. Abahugu mu by'Ebbayibbuli bateberesa baati Pawulo gayiṅandiihira mu twale ly'e Makedoniya (2:13).

Ebbaluṅa yino y'enjabulo hu ndaayi olwohuba Pawulo gaali musangaafu olw'ohunulira eripoota endani ohunwa eyiri Tito ni yinamba hu bafugiirira Kurisito ab'e Koriiso. Ebbaluṅa yino, yisomesa hu hugaba ng'olu hiri mu Ndagaano Epyaha (8-9). Hiboneha oti abasomesa ab'obudulingi baali batambisa abaatu ab'esambo embi mu hibubbu hy'abafugiirira Kurisito ehyo olw'ohwenda ohunaha Pawulo esiro. Ehyo hyamuleetera ohuloma hu bubonero ow'omuhwenda wa Yesu Kurisito.

Ebiri mu bbaluṅa yino mu buupi

1. Pawulo aheesa abafugiirira Kurisito (1:1-7)
2. Pawulo acuusa etegeha yiye (1:8-7:16)

3. Ohusoloosa obuyeedi ow'abafugiirira Kurisito ab'e Yerusaalemu (8:1-9:15)
4. Pawulo geromereraho ng'omuhwenda wa Yesu (10:1-13:10)

¹ Ndiise Pawulo, owafuuha omuhwenda wa Yesu Kurisito, olw'ohusiima hwa Hatonda ni ndi n'omulebe Temuseewo, hubanjandiihira enywe ehubbubu hy'abafugiirira Kurisito mu hibuga Koriiso, ni naabo bosibosi abali hiisi njaaatu mu twale ly'Akaya.

² Hatonda seefe ni Musengwa Yesu Kurisito, babanjambire ehisasabirisi era babanje emiyaaya.

Pawulo ajumirya Hatonda

³ Hujumirye Hatonda era Semwana ya Musengwa weefe Yesu Kurisito, Seefe oyo ow'ehisa era Hatonda agumya abaatu. ⁴ Oyo nj'atugumya ni huli mu bigosi ebya hiisi ngeri, hwesi ko hwasobola ohugumya abo ababa ni bali mu bigosi. ⁵ Hiri hiityo olwohuba eyi huhomya ohubonaabona ng'olu Kurisito gabonaabona, peyi Hatonda ahomya ohutugumya n'abita mu Kurisito. ⁶ Ohubonaabona hwefe hwahubaleetera ndinywe ohuba bagumu mu hufugiirira era ehyo hibanjeramo ohunonjoha. Hatonda n'atugumya, mwesi hibanja obugumu mwanjanga ohugumira ebigosi ng'olu efe hubigumira. ⁷ Olw'ehyo, hubalimo esuubi ery'amaani era humanyire huuti muja hugumira ebigosi hyefe, olwohuba mwesi Hatonda aja hubagumya ng'olu atugumya efe.

⁸ Aboluganda, hwahendire mumanye ohubonaabona ohuhwabitamo ni huli mu twale ly'Asiya. Batugudya exhibitiriyee era hwanwamo n'esuubi eryohuba abalamu. ⁹ Mu butuufu hyali oti hani batusaliyee ogw'ohufa. Era ehyo hyatusomesa ohutesiga amaani geefe, aye ohwesiga Hatonda yenene alamusa abafu. ¹⁰ Hatonda owatunonia ehigosi hyehyo, husuubira huuti aja hweyongera ohutunonianga ebindi. Era esuubi ly'efe liri mu mwene oyo. ¹¹ Olw'ehyo, hubasunga mutusabire era olw'esaala j'abaatu abangi Hatonda alitunja ekabi hyahena hyaleetera abaatu bangi ohumweyaasa hu lwefe.

Pawulo acuusa mu tegeha yiye

¹² Aboluganda, ehituleetera ohwepaaha hiri ti mu myoyo jeefe hunulira huuti enebisya yeefe mu baatu n'ohuhirira erala mu kolagana yeefe ni nenywe, hubaaye b'amazima eyi muli olw'amaani ga Hatonda. ¹³ Era sihunanga hubanandiihira ehiitu ehimutananga ohusoma mwategeera. Era suubira ti ¹⁴ wayire simututegeera bulani, ehiseera hiriyola mwatutegeera erala bulani, ehyo hibaleetere ohutwenyumirisamo ng'olu hwesi hulibenyumirihisamo hu ludaalo olu Yesu Musengwa aligobola ohusala emisango.

¹⁵ Era olwohuba nahitegeera, nategeha ohusookera eyo ko mwahaganyulwamo habiri. ¹⁶ Nategeha ohubahyalira ni tiina e Makedoniya, era mu hugobola nindi mbaboneho mupeho obuyeedi ni tiina e Buyudaaya. ¹⁷ Olwo,

olw’ohusalamo olugendo olwo, n̄aahani munjeega muuti sinoheresa ehi mba ni ndomire? Era munjeega muuti ekola yange yitiinira hu y’abaatu abatafugiirira Kurisito abaloma baati, “Naahole,” aye n̄abitaŋo ahaseera hatotono nga baloma baati, “Sinaahole?”

¹⁸ Aye ng’olu Hatonda ali w’amazima, obuhwenda weefe eyi muli bubulamo hwefudula.

¹⁹ Hiri hiityo olwohuba Yesu Kurisito, Omwana wa Hatonda oyu ese ni Silaasi ni Temuseewo hwabalomera ebimuŋambaho, sigefudula. Aye niye hiisi ehi aloma, ahiroma n’omwoyo mulala.

²⁰ Hiisi ehi Hatonda gasuubisa, Kurisito gahyoheresa. Era hwesi mu huja Hatonda eŋono nga hutaaho enjihiso huuti, “Amiina,” ni hubita mu Kurisito omwene oyo. ²¹ Hatonda nj’agima efe ni nenywe hwemerera n’amagulu abiri mu hufugiirira Kurisito. Era Hatonda gatujuhaho amafuta, ²² gatutaaho ahabonero ohulaga ati huli babe era gatun̄a Omwoyo wuwe ng’omusingo ohulaga ati alitun̄a ehi gasuubisa.

²³ Mu moni ja Hatonda ehi mbaloma nj’amazima ti ehyagima ndiniija eyo e Koriiso, hyali hyahubasaasira mutalumwa myoyo ni mbanenya. ²⁴ Sinenda efe hube ndiife ohubalomera engeri eyi muli n’ohufugiiriramo Kurisito aye huholera n̄alala ni nenywe ko mube basangaafu era muŋangale mu hufugiirira hwenywe.

2

¹ Kale nasalaŋo ohutagobola eyo, olwohuba ohuuja hwange hwahaban̄weweyemo

ohubanakunasa nindi. ² Hiri hiityo olwohuba singa mba ndiise abanakunasa, nj'ani aja husangaasa ohutusaho enywe aba mba ni nakunahiise? ³ Ehyo c'ehyagima nabanandiihira, ni tenda niije eyo mbanakunase ate nga muli n'ohusangaasa. Nehahasa ti ehisangaasa, hibasangaasa ni nenywe mwesi. ⁴ Ni nabanandiihira ebbaluna eyo naali n'enaku hu mwoyo era n'amasiga ni ganjituluha. Ehigendererwa hy'ohubanandiihira sihyali hubanakunasa, aye nendire hubalaga ng'olu mbenda bugali.

Ohusonija owabbenga

⁵ Hanye njaliyo owasobya hu wahye gabaleetera ohunakunala, sigasinga hunakunasa ndiise, aye gasinga hunakunasa ninywe mwesimwesi. ⁶ Ehibonereso ehi bangi hu enywe mwamuja, himuhena. ⁷ Njaahani mumusonije era mumugumye, ko enaku etamujaamba gahanda ganwamo amaani mu hufugiirira. ⁸ Mbasunga mumulage muuti muhimwenda. ⁹ Era ehigendererwa hy'ohubanandiihira, nendire hubona oba mugondera hiisi ehi mbaloma. ¹⁰ Munasonija omuutu yesiyesi, keesi musonija. Ni njaba ni njaliyo ehy'ohumusonija, hu lwenywe nahena ohumusonija era mu hino Kurisito nj'omujulizi wange. Njanabano oyu mba ni sonijire, mba musonijire. ¹¹ Ehyo kihola olwohutenda Sitaani hutuhema olwohuba humanyire ebigendererwa bibye.

Pawulo e Turoowa

¹² Ni natiina e Turoowa ohulomera abaatu Amanjuliro Amalanji aganjamba hu Kurisito, Musengwa gaali ganjiguliyeenjo engira ohubuulirayo. ¹³ Aye mu mwoyo gwange sihyambisya bulaji ohutagaanayo ow'oluganda Tito. Era ehyo hyagima nabaseebula n'atiina e Makedoniya.

Mu Kurisito huḅangula

¹⁴ Cooka hweyaasa Hatonda atuleetera ohuḅangula habuhyabuhya hulwa Kurisito era atutambisa ohusasaania Amanjuliro Amalanji aganjamba hu Kurisito agali hy'amafuta agahaloosa hwagoosa hu hiisi muutu. ¹⁵ Hiri hiityo olwohuba huli hy'olusyololo oluḅunya obulani ohuḅwa mu ḅongo eyi Kurisito anonga eyiri Hatonda ni ḅunyira abo abanoḅoha ko ni naabo abali hutiina mu husihiiriha. ¹⁶ Eyiri abo abaatiina mu husihiiriha, huḅunya hy'olumbe, aye eyiri abo abanoḅoha huli hy'ahasyololo ahalani ahaleeta obulamu. Olwo ḅaahani nj'ani amwegerageraniaho ohuhola omulimo hy'ogwo? ¹⁷ Efe sihuli hy'abaatu abandi abatambisa ehibono hya Hatonda mu ngeri ecaamu olw'ohwenda ohusuna obuḅinda. Aye efe mu Kurisito huloma amazima olwohuba Hatonda nj'owatutuma.

3

Abajeeresa ab'endagaano ya Hatonda epyaha

¹ Olwo hunaloma huutyoo, huba huli hwepaaha? Oba hwesi hwenda ebbaluḅa ejitulomaho ebirani eyi muli oba ohuḅwa eyi muli hy'abaatu abandi? ² Hiri hiityo

olwohuba enywe mwabeene muli hy'ebbaluṅa etusemba eyi banandiiha hu myoyo jeefe eyi hiisi muutu amanyire era eyi anṅanga ohusoma.

³ Hiisi muutu abona engeri eyi mufugiiriramo Kurisito, ahahasa ati muli Bbaluṅa. Ebbaluṅa eyibatanandiiha ni wiino aye n'Omwoyo wa Hatonda Omulamu. Etanandiihiwa hu bipande by'amabaale aye hu myoyo j'abaatu.*

⁴ Ehyo kiroma olw'obwesige obuhuli ni nawo mu Hatonda ni hubita mu Kurisito.

⁵ Sihuloma huuti ndiife abamanyi aye obumanyi weefe buṅwa yiri Hatonda.

⁶ Era nj'owatufuula abanṅeeresa ab'endagaano yiye epyaha abatali ṅaasi w'amagambi aga baṅa Musa aye ab'Omwoyo Omutukuvu. Hiri hiityo olwohuba amagambi galeetera abaatu ohubasalira ogw'ohufa, aye Omwoyo wa Hatonda agima baaba n'obulamu.*

⁷ Obanga amagambi agaleetera abaatu ohubasalira ogw'ohufu gaaja n'eṅono ery'amaani era hyaleetera Abayisirayiri ohutasobola huheja Musa mu moni ate nga eṅono eryo lyali lyahaseera buseera,*

⁸ olwo obunṅeeresa bw'Omwoyo Omutukuvu sibuhiraho aṅo eṅono?

⁹ Obanga amagambi agaleetera abaatu ohubasalira ogw'ohufa gaaja n'eṅono, olwo obunṅeeresa obuleetera abaatu ohuba bagwalaafu sibulihiraho aṅo eṅono?

¹⁰ Olw'ehyo ehyo ehi baatu banṅanga eṅono eryo ery'amaani sihihiri n'eṅono olwohuba hira hiri

* **3:3** 3:3 Huj 24:12; Yer 31:33; Ezek 11:19; 36:26 * **3:6** 3:6 Yer 31:31

* **3:7** 3:7 Huj 34:29

n'ejono ohuhihira. ¹¹ Njaahani obanga ehyo ehy'ehiseera buseera hyaja n'ejono, olwo hira ehy'oluberera sihirihihira ho ejono?

¹² Olw'ehyo, ng'olu huli n'esuubi eryo, husigala ni huli bagumu. ¹³ Sihuli hya

Musa owewihiriranga olugoye Abayisirayiri batabona humeregenya hwomu moni wuwe ni humunjwaho.* ¹⁴ Cooka n'ohwola olwa leero

luno nibo bahisirinjaliye ohwo olwohuba ni basoma amagambi aga banya Musa, basigala ni bafaania olwohuba Kurisito nj'eyene

awihula abaatu emoni ko bafaania. ¹⁵ N'ohwola olwa leero luno ni basoma amagambi aga banya Musa, sibagategeera olwohuba ehyabawiiha emyoyo jaawe hihiiri hubawijuhaho. ¹⁶ Aye

hiisi ocuuha gafugiirira Musengwa, amuwihula emoni ko gafaania ehituufu.* ¹⁷ Musengwa

Mwoyo era Omwoyo wa Musengwa aya aba, aleeta edembe. ¹⁸ Njaahani balabe, efe

hwesihwesi aba Musengwa gawihula emoni hwafaania, huli n'ohulaga ejono lirye era habuhyabuhya hucuusiwenga ohumufaanana olw'ejono eryo erija eyi huli mu maani g'Omwoyo Omutukuvu.

4

Embya ej'eroba ejibabiihamo eby'obuninda

¹ Hatonda nj'owatulanga olw'ehisa hihye gaatanga obunjeera buno. Olw'ehyo, sihunanga hunwamo maani ohuhola omulimo guno. ² Hwasalango ohutahola ebiitu eby'esoni

* **3:13** 3:13 Hunj 34:29 * **3:16** 3:16 Hunj 34:29

ebi baatu bahola mu ngiso, era sihutambisa bubi ehibono hya Hatonda olw'ohweyendulira ebyefe. Wabula hulomera abaatu amazima mu moni ja Hatonda era hiisi muutu amanyire hiina ehi huli. ³ Ne ni hiba ti Amanjuliro Amalanji aga hubuulira sigategereheha, sigategereheha eyiri abo abatiina mu husihiiriha. ⁴ Sigategereheha eyi bali olwohuba Sitaani gabasirinjasa, gabawiha emoni ohutabona enjase ey'Amanjuliro Amalanji aganjamba hu enono lya Kurisito owaleha ehi Hatonda ali. ⁵ Hiri hiityo olwohuba sihubuulira ebitunambaho aye hubuulira ebinjamba hu nje Yesu Kurisito nga Musengwa n'ohweromaho huuti huli banjeeresa benywe hu lulwe. ⁶ Hino huhihola olwohuba Hatonda owaloma ati, "Leha njabejo enjase yaaduhe mu hiirema,"* galagira enjase ohwaduha mu myoyo jeeffe husobole ohutegeera huuti enono lirye libonehera mu Kurisito.

⁷ Aye ehy'obuninda ehyo hiri mu ndiife ohuli hy'embya ej'eroba. Ehyo hiri hiityo olw'ohwenda ohulaga ti Hatonda nj'omwene bunangi sosi efe. ⁸ Hwosa ehiseera, ebigosi byatunyigirisa eyi ni neeyi, aye sibituhenamo maani. Era wayire ebiitu bituheehera, sihunjwamo suubi. ⁹ Batuhiyaania aye Hatonda satulehurira, batunyigirisa aye sibatusihiirisa. ¹⁰ Hiisi aja huja, hugenda olumbe olweta Yesu ni lutulengereeye, obulamu wuwe bubonehere mu mibiri jeeffe. ¹¹ Hiri hiityo olwohuba wayire huli balamu hiisi ludaalo hubita mu meeno ga

* 4:6 4:6 Tand 1:3

nasaja hulwa Yesu obulamu wuwe bubonehere mu mibiri jeefe ejifa. ¹² Olw’ehyo, efe ohufa hutulengereeye, ko enywe musobole ohusuna obulamu obutanwano.

¹³ Baloma mu Byanandiihiwa baati, “Nafugiirira, olw’ehyo naloma.”* Hwesi mu engeri nj’enyene ohufugiirira hwefe nj’ohugima hwaloma, ¹⁴ olwohuba humanyire huuti Hatonda owalamusa Yesu Musengwa, hwesi aja hutulamusa ng’olu gamulamusa era alitwanjulayo efe ni nenywe mu moni ja Hatonda. ¹⁵ Ale ni muhimanye muuti ndinywe omugima ni hubonaabona, ko ehisa hya Hatonda hyeyongere ohusasaana mu baatu, boosi beyongere ohumwebasa n’ohumuja enono.

Ebiṇeego hubitenga hu biitu ebitaboneha

¹⁶ Olw’ehyo, wayire emibiri jeefe jitiina ni jisesena, sihunwamo maani, olwohuba habuhyabuhya obulamu weefe ow’omwoyo Hatonda abugobosa bunyaaha. ¹⁷ Sihunwamo maani olwohuba ebiguudyo ebi huli hubitamo bidiidiri era by’ehiseera buseera, sibyolana n’enono eritanwano erihulisuna olw’ohubigumira. ¹⁸ Olw’ehyo ebiṇeego byefe hubitenga hu biitu ebitaboneha sosi ebiboneha. Hiri hiityo olwohuba ebiitu ebi hubonaho n’emoni jeefe by’ehiseera buseera, aye ebyo ebitaboneha byahubano emirembe n’emirembe.

* **4:13** 4:13 Zab 116:10

5

Amago geefe gali mwigulu

¹ Humanyire huuti emibiri jeefe ej'ohuhyalo jiri hy'eweema eyi batano bahena batusano. Era ni hulifa, Hatonda alituna emibiri ejindi mwigulu ejo ni jiri hy'enyumba ey'oluberera etanwano, eyi Hatonda omwene alitongola sosi abaatu. ² Ne ni huhiri mu mubiri guno hwesunga era hunemba ohwambala emibiri ejomwigulu, ³ olwohuba singa Hatonda atwambasa emibiri ejo sibaja hutwagaana ni huli wereere. ⁴ Hiri hiityo olwohuba ni huhiri mu mubiri guno, hubinda olw'obulumi olwohuba sihwenda batwambule aye batwambase ehyambalo ehyo ehyomwigulu; omubiri ogwo ogutafa gumire guno ogufa. ⁵ Ehyo Hatonda omwene gahena ohuhitegeha era gatuna Omwoyo Omutukuvu ohuba ahabonero eyi huli ohuhahasa ati ehyo hiribano.

⁶ Olw'ehyo, ehituna obugumu habuhyabuhya hiri ti humanyire huuti ni huhiri mu mubiri guno sihunanga huba yingo eyiri Musengwa. ⁷ Era hu hyalo huno hubaaho ni hwesiga Hatonda olw'ebiitu ebi gatusuubisa, wayire sihubibona n'emoni. ⁸ Olw'ehyo huli bagumu ne ehihwasasingire ohwenda nj'ohunwa mu mubiri guno hutiine hube ni Musengwa. ⁹ Kale hwefaaho ohusangaasa Musengwa hahibe ti huhiri mu mubiri guno oba hutiinire eyo eyi husuubira ohutiina. ¹⁰ Hiri hiityo olwohuba hwesihwesi hwenda sihwenda hulyemeerera mu moni ja Kurisito ohutusalira omusango ko hiisi muutu

asune ehimusaanira olw'ebiiitu ebirani oba ebibi ebi ahola n'ahiiri mu mubiri guno.

Kurisito nj'atufaanania ni Hatonda

¹¹ Olw'ehyo, ng'olu humanyire huuti hyetagisa ohuḡa Musengwa eḡono, huhubbirisa abaatu bebbwage. Hatonda atumanyire bulani era suubira ti mwesi mu myoyo jenywe mumanyire ehi huli. ¹² Ne sihuli hugesyaho hweromaho nindi eyi muli aye hwenda mube nehimwemaho ko mwepaaha hu lwefe, era mube n'ehyohulomera abo abepaaha olw'ebiiitu eby'ohumugulu mu hifo hy'ebyo ebyomu mwoyo. ¹³ Ni huba ni huli balalu ng'olu baloma, huli balalu olwa Hatonda. Ne ni huba ni hutali balalu, ehyo hiyeeda ndinywe. ¹⁴ Hiri hiityo olwohuba ohwenda ohu Kurisito atwendamo nj'ohutuḡuga, era hwehahasa huuti ye omulala hu wuwe gafa hu lw'abaatu bosibosi, era olw'ehyo bosibosi nga baba oti abafuuye. ¹⁵ Era olw'ohufa huhwe hulwa abaatu bosibosi abo abalamu bali n'ohumanya baati sibalamu hu lwawe aye hu lw'oyo owabafiiririra gahena galamuha.

¹⁶ Olw'ehyo, sihuhitambisa magesi ag'obuutu ohutegeera ebifa hu muutu, wayire nga hwatambisanga amagesi g'obuutu ohumanya ehi Kurisito ali. Naahani humutegeera mu engeri eyindi. ¹⁷ Olw'ehyo, singa omuutu yesiyesi aba mu Kurisito aba afuuhire hitonde hinyaaha, ebihale biba biḡooyeḡo n'afuhiire muutu munyaha. ¹⁸ Ebyo byosibyosi Hatonda owafaanana ni neefe n'abita mu Kurisito nj'abihola. Era gahena gatuḡa

obujeeresa ow'ohuhubbirisa abaatu abandi boosi bafaanane ni naye. ¹⁹ Ehiri ti Hatonda afaanana n'abaatu bosibosi n'abita mu Kurisito, añañuma hubabalira ebibi byawe. Era gaatunja obujeeresa ow'ohulomera abaatu obuhwenda obunamba hu hufaanana ohwo. ²⁰ Olw'ehyo huli bahwenda ba Kurisito, era Hatonda abahubbira omulanga n'abita mu hubuulira hwefe. Hubegayirira mu esiina lya Kurisito mufaanane ni Hatonda. ²¹ Hatonda ganayo Kurisito ate nga sigaholaho hibi hyosihyosi ohuba enongo olw'ebibi byefe. Era olw'ehyo hunaba bulala ni naye Hatonda atubala ohuba bagwalaafu.

6

¹ Naahani ng'olu Hatonda gatunja ohuba abatambi ni naye, hubegayirira ohutatambisa bubi ehisasabirisi ehi gabaña. ² Hatonda aloma ati,

“Mu hiseera hyange ehituufu
nabagobolamo,
era hu ludaalo olw'ohunonoha
nabayeeda.”*

Era mbalomera ti hino nj'ehiseera hya Hatonda, era olwa leero nj'oludaalo olw'ohunonoha.

Ebigosi ebi Pawulo gaasuna

³ Sihwahendire hwesitaaza muutu yesiyesi mu bihuhola ko batanaha obujeeresa weefe esiro. ⁴ Aye mu hiisi hiitu hulaga huuti huli baneeresa ba Hatonda. Olw'ehyo hwehaliiriha

* **6:2** 6:2 Yis 49:8

bugali ebigosi omuli embeera embi, ⁵ ebihubbe, ohutubona mu komera, abaatu ohutuyabuluhiraho, ohutamba emirimo ej'amaani, ohutalimba hwiwo n'ohuhaya ehyohulya.* ⁶ Era hulagire huuti huli bajeeresa ba Hatonda mu nebisya yeefe, mu hulaga huuti hutegeera Hatonda, mu hugumikiriza n'ohuba ab'ehyere, n'omuhuboneha ti amaani g'Omwoyo Omutukuvu gaholera mu fe era ti ohwenda hwefe hubulamo hwhehubbira. ⁷ Ni hwongera hu ebyo, hulomera abaatu Amanjiliro Amalanji mu maani ga Hatonda. Era hutambisa obugwalaafu ng'ehisoosa mu muhono gwefe omulungi n'omugooda. ⁸ Nalino abatuna enono abandi batujerega, abatulomaho ebirani abandi ebibi, abatulanga baati huli bajeeresa abatuufu abandi baati huli badulingi. ⁹ Batunjira hy'abaatu aba batamanyire ate nga batumanyire. Batubalira mu bafu aye huli balamu, era batugudya baatwite aye sihufa. ¹⁰ Wayire batunakunasa, husigala ni huli basangaafu. Wayire huboneha hy'abagadi, huleetera bangi ohuba baninda. Wayire huboneha oti hujuma hiitu hyosihyosi, huli ni hiisi hiitu.

¹¹ Enywe abaatu b'e Koriiso, efe hiisi hitu huhiromire mu lwatu eyi muli ni njanuma ehihubagisa. ¹² Efe hubalagire huuti mutuli hu mwoyo aye enywe mutulagire muuti hubali njaleeni mu binjeego byenywe. ¹³ Mbasunga ng'olu nahasungire abaana bange, mwesi mutulage muuti hubali hu myoyo jenywe.

* 6:5 6:5 Bik 16:23

*Mutaholanga muhumba n'abatafugiirira
Kurisito*

¹⁴ Mutaholanga muhumba n'abatafugiirira Kurisito. Hiri hiityo olwohuba njanuma ehinanga ohunjimba abaatu abahola ebirujamu n'abahosi b'ebibi. Oba kolagana hi enjanga ohubano ngati w'enjase n'ehiirema?

¹⁵ Kolagana hi eringo ngati wa Kurisito ni Sitaani? Hiina ehinimba omuutu afugiirira Kurisito n'atamufugiirira? ¹⁶ Era kolagana hiina eringo ngati wa Yekaalu ya Hatonda n'eyebitali Hatonda? Huli Yekaalu ya Hatonda omulamu. Era Hatonda galoma ati, "Naabenga mu bo era nagendenga ni nabo. Nja huba Hatonda waawe, boosi banaabenga baatu bange."*

¹⁷ Era Musengwa aloma ati,
"Olw'ehyo, mubanjwemo,
mubeyabuleho.

Mutanjambanga hu hiitu ehitali hitukuvu,
keesi nja hubasangaalira."*

¹⁸ "Nja huba Senywe,
mwesi muja huba baana bange.
Ese Musengwa Omwene Bunjangi, ndiise
aloma."*

7

¹ Bameeri bange abahoda, ng'olu batusu-ubisa ebyo byosibyosi, hulongoose obulamu weefe hulehe ohuhola ebiitu ebyonoona emibiri

* **6:15** 6:15 Mu bitabo ebindi bamulanga baati Bbeliya. * **6:16**
6:16 Leev 26:12; Ezek 37:27; 1 Kor 3:16; 6:19 * **6:17** 6:17 Yis
52:11 * **6:18** 6:18 2 Sam 7:14; 1 Linjo 17:13; Yis 43:6; Yer 31:9

n'emyoyo jeefe, ko husobole ohubeera erala abagwalaafu olw'ohutya Hatonda.

Esangaalo lya Pawulo

² Bahyange mubeho n'anamututa mu myoyo jenywe. Enuma muutu oyu huholangaho ehibi oba oyu hulyakulangaho oba oyu hwebaho. ³ Sindoma hino hubasalira musango. Nahiromaho hale ti mutuli hu myoyo era huli njalala mu bulamu nomu hufa. ⁴ Mbesiga bugali era mbenyumirihisamo. Olw'ehyo wayire mbaaye n'ebigosi bingi aye sigaaye ni ndi musangaafu bugali.

⁵ Era ni hwola e Makedoniya, sihwasonaho bunjeerero olwohuba batugudya mu hiisi ngeri era ehiseera c'ehyene ni hunjirijana n'abaatu ko n'obuti owaali mu myoyo jeefe. ⁶ Aye Hatonda agumya abo abanjyemo amaani gatugumya n'abitira mu huuja hwa Tito n'anjwa eyo. ⁷ Ohuuja huhwe sinje ohwatugumya hwojene, aye hwasuna obugumu ni gatulomera ng'olu mwamusangaasa bugali. Tito gatulomera ng'olu munjamba ohumbonaho, ng'olu mwehubba mu hifuba olw'ebyo ebyaliyo, era ng'olu mundumirwa bugali. Ebyo byosibyosi byeyongera ohusangaasa.

⁸ Wayire ebbaluja eyi nabanandiihira yabaleetera ohunakujala, sinehebulisa lwahiina nayinjandiiha. Ne wayire noola ehiseera nehebulisa olwohuba yabanakujasa, ehyo hyali hya ahaseera buseera. ⁹ Cooka njahani ndi musangaafu silwohuba ti nabanakujasa, olwohuba ohunakujala hwenywe hwabaleetera

ohwehubba mu hifuba mwenenya. Hwali husiima hwa Hatonda enywe ohunakujala, olw'ehyo njanuma hibi ehi hwabahola. ¹⁰ Ohwehubba mu hifuba ohu Hatonda asiima hugima omuutu genenya hyamuweramo ohunonoha era omuutu oyo sigehebulisa. Aye ohwehubba mu hifuba ohwa hamooyo mooyo, hunwamo ohusihiiriha. ¹¹ Ale mubone ohwehubba mu hifuba ohusangaasa Hatonda ng'olu hwaleetera hiisi mulala hu enywe ohwenosyaho, obusungu ohubanjamba olwa oyo owanwaho endibo n'ohutandiha ohuutya, ohujemba ohumbonaho. Era hyabaleetera ohwenda bamubonerese omuhosi w'ebibi. Mu ebyo byosibyosi mwalaga muuti njanuma eh'yohuboloobya. ¹² Olw'ehyo sinanjandiiha hu lw'omuutu owahola ehibi, oba olwa oyo oyu basobyaho, aye nabanjandiihira lw'ohwenda huhahasa mu moni ja Hatonda ti mutwenda.

¹³ Ebyo byosibyosi bitugobosamo amaani. Era ohumeeda hu ehyo, hwali basangaafu bugali olwohuba mwesimwesi mwaleetera Tito ohuba musangaafu. ¹⁴ Naali nenyumirihise eyiri Tito ng'olu muli balanj, hiranj ti simwaswasa. Aye ng'olu byosibyosi ebi hwabalomera byali bitu-ufu, n'ohwenyumirisa hwefe eyiri Tito sihwali hwabudulingi. ¹⁵ Era Tito abenda bugali mwesimwesi ohuhirira erala nahebulira engeri eyi mwamusangaaliramo, ng'olu mwamugondera ko n'enono eri mwamuja. ¹⁶ Ndi musangaafu olwohuba mu biitu byosibyosi panga ohubesiga.

Ohugaba

¹ Aboluganda, ñaahani hwenda mumanye hu biñamba hu hyere ehi Hatonda gaanja ebibbubbu by'abafugiirira ebyomu twale ly'e Makedoniya. ² Wayire baali n'ebigosi eby'amaani era ni bali bagadi bugali, basigala ni bali basangaafu, era ehyo hyabaleetera ohugaba n'omwoyo mulala. ³ Mbalomera ehituufu ti bagaba n'ohusingisaho ng'olu baali ni basobola. Era ehyo bahihola hulwa ohwenda hwawe abeene. ⁴ Batwegayirira bugali hubafugiirire ohusoloohesa abaatu ba Hatonda abali mu Yerusaalemu obuyeedi. ⁵ Baahola ehi hwali ni hutabasuubiramo! Beheerera hwenjaye eyiri Musengwa, ng'oluvanyuma batwenja hwesi olw'ohusiima hwa Hatonda. ⁶ Olw'ehyo hwahubbirisa Tito ohutiina mu moni n'omulimo ogw'ohubasoloosamo obuyeedi, mu ngeri eyi gaali n'agutagihireho. ⁷ Aye ng'olu muli ndinywe abasinga abahyenywe mu hiisi hiitu; mu hufugiirira, mu hubuulira, mu humanya ebiñamba hu Hatonda, mu huba abaheneerefu era nomu hutwenda, hwenda mube c'ehyene nomu hugaba.

⁸ Sindi hubalagira aye nenda hubona obuhenerefu bw'ohwenda hwenywe ni ngeragerania n'ohwenjaayo hw'abaatu abandi. ⁹ Mumanyire ehyere ehi Musengwa weefe Yesu Kurisito ali ni nahyo. Wayire gaali muñinda ne gafuuha mugadi hu lw'ohwenda mufuuhe baninda hu lw'obugadi wuwe.

¹⁰ Ese, hino nj'ehijeego hyange hu biñamba hu husoloosa obuyeedi. Omwaha ogubitire

ndinywe omweheerera simu husoloosa hyonene aye nomuhuba baheneerefu ohuhihola. ¹¹ Olw'ehyo muheneerefu omulimo ogu mwatagiha era obuheneerefu obu mwali ni nawo butiinire njalala n'ohuhita mu kola ni mwema hu pamba yenywe. ¹² Hiri hiityo olwohuba omuutu anagaba n'obuheneerefu, era ganyaayo ni geema hu ebi ali ni nabyo Hatonda amusiima era samubalira hugaba ebi anjuma.

¹³ Sinenda hubahalubya, abandi ni beyagala aye nenda njabejo ohunjeranera. ¹⁴ Mu hiseera hino muli n'ebingi, olw'ehyo hiraŋi muyeede abo abanjuma. Era mwesi ni muna-habe ni munjuma nibo ni bali ni nabyo, banahabayeede. Mu ngeri eyo nanahabe njalijo ohunjeranera. ¹⁵ Ng'olu hyanandiihiwa hiiti, "Oyo owahumbaanianga ebingi, sigaali n'ebingi era ni nooyo owahumbaanianga ebitotono, sigaali n'ebitotono."*

Batuma Tito ohutiina e Koriiso

¹⁶ Neyaasa Hatonda owaŋa Tito omwoyo ogubalumirwa hy'ese. ¹⁷ Sigahoma hu hufugiirira ehi hwamuloma ohuhola hyonene, aye yeesi omwene gaali muheneerefu ohuuja eyi muli abayeede. ¹⁸ Era huli humutuma n'omulebe oyu ebibbubbu by'abafugiirira ebyeno byosibyosi bija enono olw'ohulomera abaatu Amanjuro Amalaji. ¹⁹ Era n'ehindi, ebibbubbu by'abafugiirira Kurisito byamwangala atunjererehere ni hunjira obuyeedi, olw'obujeeresa buno obu huhola

* 8:15 8:15 Hunj 16:18

ohuŋa Hatonda eŋono n'ohulaga ng'olu huli baheneerefu ohuyeeda.

²⁰ Hwenda hwegenderese ŋatabaŋo hwemulugunya hu engeri eyi husoloosamo n'eyi hugabamo obuyeedi obubitiirifu hy'obwo.

²¹ Ehigendererwa hyefe huhola ebiruŋamu, simu moni ja Hatonda yeŋene, aye nomu moni j'abaatu boosi.*

²² Olw'ehyo huli hubaŋindihira omulebe owundi ŋalala ni nabo. Mirundi mingi, huweene omulebe oyo n'alaga ati munyikifu mu hwenda ohuyeeda abahye. Era ŋaahani geyongeeeye ohunyikira olwohuba abalimo esubi ebbala eryohugaba ni muteemota.

²³ Tito niye mumumanyire muuti mutambi wahyange oyu kola ni naye olw'ohubagasa. Abalebe aba ali ni nabo, bahwenda ohuŋwa mu bibbubbu by'abafugiirira ebyeno, abaŋeesa Kurisito eŋono.

²⁴ Olw'ehyo mulage abasaaja abo obuhahafu w'ohwenda hwenywe ko ebibbubbu by'abafugiirira byosibyosi bihahase era bimanye biiti ebi hubenyumirihisamo, bituufu.

9

Ohuyeeda abafugiirira Kurisito

¹ Sihinjetagisa hubaŋandiihira hu biŋamba hu buyeedi obwohuŋirira abafugiirira Kurisito abali mu Yerusaalemu. ² Hiri hiityo olwohuba manyire ti muli baheneerefu ohuyeeda, era

* **8:21** 8:21 Nge 3:4

mbayenga mbapaaha eyiri abaatu b'e Makedoniya ti ohunwa omwaha ogwo, abalebe abomu twale ly'Akaya baheneerefu ohusoloosa obuyeedi. Era obuheneerefu wenywe buleteeye bangi ehinyeegenyege boosi ohwenda ohunayo obuyeedi. ³ Aye ndihunindiha abalebe abo ko ohupaaha ohunabapaaha hu hutaba hwawereere, aye mube betegefu ng'olu naloma ti muli betegefu. ⁴ Hiri hiityo olwohuba singa niija n'abalala hu baatu b'e Makedoniya, hwagaana ni mutetegehire, ehyo hija hutuleetera si efe hwenene aye ni nenywe mwesi ohuswala olwohuba naali kenire ohubapaaha. ⁵ Olw'ehyo mbona ti hiraŋi ohubasindihira abalebe beheerere ohubahyalira, babayeede ohuheneresa etegeha ey'ohusoloosa obuyeedi obu mwasuubisa. Ehyo ko hirage hiiti mwanayo muhweyendera, ananuma hubanalirisa.

⁶ Muhebulire muuti oyo amwa anatono, aligesa bitotono era ni nooyo amwa anabbala, aligesa bingi. ⁷ Olw'ehyo hiisi muutu agabenga ng'olu aba n'asalireŋo mu mwoyo gugwe, sosi muhwenagia oba olw'ohumuŋagia. Hiri hiityo olwohuba Hatonda genda omuutu agaba n'esangaalo. ⁸ Era Hatonda ananga ohubana n'ebisingaho ebi mwetaaga, ko musobole hisisi hiseera ohuba n'ebibahena era musobole ohutambisa ebisigalaho ohuyeeda abali muwetaavu. ⁹ Era Ebyanandihiwa biroma biiti, "Gagabira abagadi n'ehyere, era balihebulira ehyere hihye emirembe n'emirembe."*

* 9:9 9:9 Zab 112:9

10 Era Hatonda aña omulimi owumo owohumwa n'emere ey'ohulya, aja hwaswa owumo wenywe mwaheyongera ohuyeeda abo abanuma. 11 Hatonda aja hweyongera ohwaswa hiisi ehi muli ni nahyo ko musobole ohuḅa obuyeedi abanuma era obuyeedi obwo ni bubita mu efe ohwola eyiri abo abawetaaga ko abaatu abo beyaasenga Hatonda olw'ebyo ebi muholire. 12 Ehyo kiroma olwohuba obuyeedi wenywe sibuhoma hu huleetera abaatu ba Hatonda ohusuna ebi banuma hyonene, aye higima baatu beyaasa Hatonda bugali.

13 Ni balibona ehyere hyenywe eyi bali ko n'eyiri abaatu abandi, baja hujumirya Hatonda olwohuba muliba mulagire ng'olu mugondera ebiragiro bibye era ti mu butuufu oweene mwafugiirira Amanjuliro Amalanji aga Kurisito. 14 Era muja huba bahoda eyi bali era babasabirenga ekabi ohuḅwa eyiri Hatonda olw'ehyere ehy'amaani ehi gabaḅa. 15 Era hweyaasa Hatonda olw'ehirabo hihye ehyo ehyenunjisa.

10

Omuhwenda wa Kurisito

1 Ese Pawulo oyu abandi munywe baloma baati mbo ndi muti era baati mbo nimba ni nenywe tya ohubahayula aye aña mubula nga ko nehambuḅasa mu bbaluḅa, hambalombe ni mbegayirira olw'ehisa n'ohwenomeha hwa Kurisito. 2 Mbasunga mutandeetera huba n'ehabyo ni niijire eyo, olwohuba eyo, eriyo abaloma baati huli baatu buutu hya nibo

era hwesi hwebisya ng'olu baatu abandi mu hyalo hino bebisya. Olw'ehyo suubira ohuba n'obusambuha eyi bali. ³ Hiri hiityo olwohuba, wayire hwesi huli baatu buutu ng'olu baloma, efe sihusoola mu ngeri eyi baatu buutu basoolamo. ⁴ Ebisoosa ebyefe sibya mu hyalo hino aye binwa eyiri Hatonda era biri n'amaani ohusiirisa amaani g'omusigu. ⁵ Husimya ebi-bono byosibyosi ebireetera abaatu ohutamanya Hatonda. Era hucuusa epeega yaawe baba ti bagondera Kurisito. ⁶ Ni munahafuuhire erala abagondi eyiri Kurisito, huja hugudya hiisi muutu omujeemu.

⁷ Mulengerere esonga era mufaanie ehitu-ufu. Oyo oweneegaho ati nje yenene aneeresa Kurisito, ali n'ohuhimanya ati hwesi huli baneeresa ba Kurisito abatuufu. ⁸ Wayire nepaaha olw'obunangi obu Musengwa gaatunja, ehyo sihipambya soni olwohuba Kurisito gaabutunja ko husobole ohubagumya mu hufugiirira sosi ohubahenamo amaani. ⁹ Sinahendire huboneha oti mbatihirisa n'ebi pandiika mu bbalunja jange. ¹⁰ Hiri hiityo olwohuba abaatu abandi baloma mbo, "Ebbalunja ja Pawulo kambwe era j'amaani, aye omwene munafu n'ali ni neefe era ebi aloma adafaaya hudafaaya." ¹¹ Aye abaloma baaty, bali n'ohumanya baati ebi huloma mu bbalunja jeefe, mbebi hulihola ni hujire eyo.

¹² Efe sihweta hu daala erala oba ohwegeragerania hu abo abeginiha. Abeene beeterano esambo eji baneega baati tuufu era bajifuula ehipimo ehy'ohwegerageranishyaho

abeene hu beene. Ehyo hiraga busiru. ¹³ Ne efe sihuja hwepaaha ohuhiraho ng'olu hisaana, ohutusaho huja hwepaaha hu binamba hu mulimo ogu Hatonda gatunambya, era mwesi omulimo ogwo gubahooheramo. ¹⁴ Hwahali hutuumire esalo ohwepaaha hu lwenywe mubanga ni mutali balala hu abo aba Hatonda gatunambya ohulomera Amanuliro Amalanji aganamba hu Kurisito. ¹⁵ Ate era sihwepaaha hulwa ebi bandi bahola ebulafu w'esalo j'omulimo ogu Hatonda gatunambya.* Husuubira huuti muja hunangala mu hufugiirira hwenywe era n'omulimo gwefe mu enywe gweyongere ohugalama. ¹⁶ Ehyo hyahatuleetera ohubuulira Amanuliro Amalanji mu bitundu ebindi olwohuba efe sihwepaaha olw'omulimo ogu bandi baahola. ¹⁷ Aye hyanandiihiwa hiiti, "Oyo owepaaha, gepaahenga olwa Musengwa."* ¹⁸ Hiri hiityo olwohuba omuutu oweginiha, sinje oyu Musengwa asiima aye asiima nj'oyo oyu omwene aginiha.

11

Pawulo n'aberanga abahwenda

¹ Nahabasungire mwehaliriheho obusirusiru wange. Era peega ti muli huhihola. ² Mbabubira

* **10:15** 10:15 Oba: Sihuja hwepaaha olw'ehiitu ehi otananga hupima aye huja hwepaaha ni hwema hu hipimo ehi Hatonda omwene hipimo gatutuma ohuhola, nga mwesi pomu muli. Era sihwepaaha olw'ehiitu ehi bandi baahola. * **10:17** 10:17 Yer 9:24

era ewuba erindi ni nalyo liŋwa yiri Hatonda, olwohuba nabahobya nabaleeta eyiri Kurisito mube babe yenene, mbaneyo eyi ali ni muli bagwalaafu hy'omuhaana atanenyuhangaho n'omusinde. ³ Aye ndimo ohutya ti ng'olu etemu yadulinga Kaawa, mwesi muŋangire ohubbaama mwanŋwa hu mazima ga Kurisito.*
⁴ Hiri hiityo olwohuba muli bangu b'ohufugiirira omuutu singa gaaja gabuulira ebiŋamba hu Yesu owundi, otali oyo oyu hwabuulira oba mwafugiirira omwoyo owundi atali oyo oyu mwasuna oba mwafugiirira Amanŋuliro agandi agatali ago aga hwabalomera. ⁵ Aye sipeega ti abo abeeranga abahwenda abahihenaho bali n'ehibaakira. ⁶ Pangire ohuba ni taali mulomilomi mulanji, ne abo sibaakira humanya amazima era mu hiisi ngeri ehyo hwahibahahasa bulanji.

⁷ Ni nababuulira Amanŋuliro Amalanji ohunŋwa eyiri Hatonda, sinabasasulisa. Olwo ko muŋeega muuti obuhwenda obu nabalomera waali bunjumamo samuuna? Oba nahola hibi ohweyisa tyo? ⁸ Ni naali eyo ni mbaholamo omulimo, nali hy'onyaga ebibbubbu by'abafugiirira Kurisito ebindi, olwohuba mbebi nasunangamo obuyeedi mu hifo hy'ohubusuna mu enywe. ⁹ Era ni naali eyo, ni ŋabangaŋo ehi nenda, ŋanŋumanga wayire mulala hu enywe oyu nasitonŋereranga olwohuba abalebe ab'e Makedoniya bandeeteranga obuyeedi. Nehuumanga ohutaba n'engeri yosiyosi

* **11:3** 11:3 Tand 3:1-5,13

ey'ohusitonolera muutu yesiyesi era nja hweyongera ohutabasitonjerera.

¹⁰ Mu hino njanuma muutu yesiyesi mu twale ly'Akaya aja hundobera ohwepaaha olwohuba njanuma ehi ndicusamo ohufugirira obuyeedi ohunwa eyi muli. Era ehi ndoma nj'amazima mu siina lya Kurisito ali mu bulamu wange.

¹¹ Mutanjeega muuti hino kiroma olwohuba simbenda. Mu butufu ni Hatonda yeesi amanyire ati mbenda.

¹² Wabula nja hutiina mu moni n'ohutanaana obuyeedi wenywe olw'ohwenda ohusimya abo aberanga abahwenda bataba n'ehi bemaho ohwepaaha n'ohutwegerageraniaho.

¹³ Abaatu abo abeeranga abahwenda bakuyakuyi, era mu bukuyakuyi waawe beranga ohuba bahwenda ba Kurisito.

¹⁴ Era ehyo sihyenunjisa, olwohuba ni Sitaani yeesi gefuula ohuba malayika ow'enjase.

¹⁵ Mu ngeri nj'enyene sihyenunjisa abanjeeresa babe ohwefuula ohuba abanjeeresa abahola ebirunamu. Ne hu komerero baja husuna ehibonereso ehisaana ebikolwa byawe.

Ohubonaabona hwa Pawulo ng'omuhwenda

¹⁶ Ng'olu kenire ohuhiroma nindi hambagoboleremo: Mutanjeega muuti ndi musiru. Aye ni muba ni muneega muutyo, kale mupire hy'omusiru keesi nepaaheho.

¹⁷ Ohwepaaha hwange huno, sihunwa yiwa Musengwa, aye kihola ng'omusiru.

¹⁸ Ng'olu bangi bepaaha olw'ebibaholire, keesi hanepaaheho. ¹⁹ Olwohuba muli bagesi ehihena nj'ehigima ni mwehaliriha ebibono

by'abasiru abo? ²⁰ Dala ndimufayo omuutu ohubafuula abeedu babe oba ohubanyaga, oba ohubacuuhisa n'ano ni nanjala, oba ohubeeba lubona? ²¹ Kale handome ti swaye olwohuba sihwajanga hubahola hy'abo. Aye nanabano owepaaha mu hiitu hyosihyosi, keesi nja hwepaaha era hino kiroma hy'omusiru. ²² Abepaaha abo sibaloma mbo Mubbebulaniya? Keesi ndi Mwebbulaniya. Baloma baati mbo Bayisirayiri? Keesi ndi Muyisirayiri. Baloma baati mbo bejuhulu ba Yibbulayimu? Keesi ndi mwijuhulu wa Yibbulayimu. ²³ Kaho baloma baati mbo bajeeresa ba Kurisito? Oba ndi huloma hy'omulalu. Ese kolire emirimo ohubahira. Basidihire mukomera emirundi mingi ohubahira. Emirundi mingi batiinire ni bakubba bugali ohubahira era punyire hu hufa emirundi mingi. ²⁴ Emirundi etaanu, Abayudaaya bakubba esimbo amahumi adatu namwenda.* ²⁵ Emirundi edatu ni batambisa oluga, lulala baakubba amabaale era emirundi edatu eryato omu naali ni gendera lyabwagiha nahena omuusi n'owiire mu nyanja naagati.*

²⁶ Mu ngendo jange enyingi eji ngendire, ponire enjabi ohundya, abeebi, ebigosi ebi Bayudaaya bahyange ko n'Abatali Abayudaaya banjohiseho. Ponire ebigosi mu bibuga nomu byalo, mu nyanja ko n'abaatu aberanga mbo balebe mu Kurisito.

²⁷ Fululuhene ni fabina bugali ni kola omuusi

* **11:24** 11:24 Mag 25:3 * **11:25** 11:25 Bik 16:22; 14:19

n'owiire ohweyemeresano era ebiseera bingi ni talimba hwirow. Enjala n'enduwo birumire hu ese emirundi mingi. Embeno efuunire hu ese ni puma hyahwedanya hu magumba. ²⁸ Ebyo n'obitaaye hu tulo, hiisi ludaalo pulira ni nyigirisiwa n'omugugu ogw'ohulabirira ebibbubbu by'abafugiirira Kurisito byosibyosi. ²⁹ Nj'ani anwamo amaani, ndi ndumwa? Nj'ani ahemewa gaagwa mu hibi, nasihinduma?

³⁰ Nimba wa hwepaaha, nja hwepaaha olw'ebyo ebiraga obunafu wange. ³¹ Hatonda era Semwana wa Musengwa weefe Yesu Kurisito, oyu baatu bali n'ohuna enono emirembe n'emirembe, amanyire ati sindulinga. ³² Ni naali mu hibuga Damasiko, gavana oyu habaha Areete gatajo, galagira abasirikale babe ohuhuuma ehibuga ehyo butiribiri bapambe, ³³ aye abahyange nga baata mu gunaaba nga banjihisa mu dinisa eryali mu hiteepe ehyali ni hyeswanigirisa ehibuga, nga punuha.*

12

Ohwolesewa hwa Pawulo

¹ Naahani leha nindi nepaache wayire nga nanuma ehi higasa. Leha mbalomere ebinamba hu hwolesewa nohu biitu ebi Musengwa weefe Yesu Kurisito gaakwehulira. ² Emyaha ehumi neene ejibitireno, Hatonda gaanira mulala hu abafugiirira Kurisito, mwigulu eryohudatu. Era omuutu oyo mumanyire ne simanyire oba hyaliwo n'ahiiri mulamu oba hwali hwolesewa,

* **11:33** 11:33 Bik 9:23-25

aye Hatonda omwene nj'amanyire. ³ Ese manyire ti omuutu oyo oba gaali ahiiri mulamu oba bbe, ehyo Hatonda omwene nj'amanyire, ⁴ ese ehi manyire hiri ti bamujira mu hifo ehy'ohwesiima. Ni goola eyo, ganjulira ebibono ebi muutu atasobola hunyonyola era anjuma lukusa ohubiroosa. ⁵ Kale nja hwepaaha olwebyola hu muutu oyo aye sinja hwepaaha olw'ebyo ebipambaho ohutusaho obunafu wange. ⁶ Ate nindi wayire saalano ohwepaaha, sihiba ni hiraga hiiti ndi musiru olwohuba gahali mazima. Aye sinabijemo olwohuba sinenda muutu yesiyesi ohumbona mu hifaananyi ehindi ohuhiraho ehy'ebyo ebi kola oba ebi ndoma.

⁷ Aye Hatonda olw'ohwenda tehudumbasa olw'ebiitu ebyenjijisa ebi nabona, gaasyoha olunwa mu mubiri lungudye. Olunwa olwo, nj'omuhwenda wa Sitaani. ⁸ Era efunda edatu negalihira Musengwa weefe gaponie obulumi obwo. ⁹ Aye gangobolamo ati, "Ehisasabirisi hyange hihuhena, olwohuba amaani gange gabonehera mu bunafu." Olw'ehyo nja hwepaaha olw'obunafu wange ko obunangi wa Kurisito bubonehere mu ese. ¹⁰ Ehyo c'ehigima hulwa Kurisito naaba musangaafu olw'obunafu wange, nolu abaatu banduha, nolu mba mu bigosi, nolu bakiyaania, nolu mbonaabona olwohuba nimba munafu anjo ko mba ndi w'amaani.

Obuuti obu Pawulo ali ni nawo olw'esambo j'Abakoriiso

11 Fuuhire hy'omusirusiru, aye ndinywe omundeteeye ohwebisya tyo. Mwahali musiima olwohuba abahwenda aberanga ab'amaani abo sibaakira wayire nga puma aya ndi. 12 Ni naali eyo, mu hugumikiriza ohw'amaani nahola obubenero owenjunjisa ko n'ebyamaliholiho ohubalaga ti ndi muhwenda omutuufu. 13 Ebibbubbu by'abafugiirira Kurisito ebindi bibahira mu ngeri hi? Ohutusaho ti nibo nabasunganga obuyeedi aye enywe bbe. Musonje olw'ohubaleha ebulafu mwihyo.

14 Naahani netegehire ohubahyalira omulundi ogwohudatu, cooka era sinja hubasitonjerera. Hiri hiityo olwohuba simbendaho byenywe, aye nenda myoyo jenywe. Muhimanyire bu-laji muuti muli baana bange. Ne abaana sinje ababiihiraho abasaaye baawe aye abasaaye nj'abalabirira abaana baawe. 15 Nja huba musangaafu ohunayo ebyange byosibyosi era keesi neneereyo erala hu lwenywe. Wayire nga mbenda bugali, enywe munyenda hamooyo-omooyo.

16 Muhimanyire muuti sinabasitonjerera, aye abandi hu enywe baneega baati mbo ndi mukuyakuyi era nabadulinganga. 17 Ne ehyo nahiholanga mu ngeri hi? Mu abo aba nabatu-miranga, mulimo oyu n'atambisa ohubalyakula? 18 Nasunga Tito ohuuja eyi muli era gaaja n'omulebe owundi. Nalijo ehi Tito gabalyakula? Episa yange n'eyiye sinje enyene era sihuli n'ehigendererwa hirala?

19 Oba muneega muuti huli hwenoomya hwenoomya mu moni jenywe? Efe, mu

moni ja Hatonda huloma ng'olu Kurisito genda hulome era hiisi ehi huhola huhihola olw'ohubayeeda. ²⁰ Tya ohuuja eyo mbagaane ni mutali ng'olu nenda mube era mwesi mumbone ni tali mu hifaananyi ehi musuubiriramo. Tya ohuuja mbagaanemo obuyoga, egongi, obusungu, ohwesalalalamo obubbubbu, owiimi, ohujahana esiro, ohugeyana, ohwehudumbasa n'ohwetabujula. ²¹ Era tya ti ni nahaaje, esoni jiripamba mu moni ja Hatonda wange, ehyo hindetere ohulira amangi olw'abangi hu enywe, njanyuma anjo abaahola ebibi ndibebbwaga ebibi ebi bahola, omuli ohwejabaata n'obuhwedi n'ohuba n'emoni enyangu.

13

Ohulabula ohusembayo

¹ Guno guja huba mulundi gwohudatu ohuuja eyo ohubahyalira. Ehyanjandihiwa hiroma hiiti "Hiisi songa bayihahasenga ni njalino obujulizi ow'abaatu babiri oba badatu."* ² Ni nabahyalira efunda eyohubiri nalabula abo abaahola ebibi ko ni naabo bosibosi abali hubbenga. Era wayire sindi ni nenywe, ngobolamo ohubalabula ti ni nahaaje, njanyuma muutu abbenga oyu ndisasira. ³ Ehyo kiroma olwohuba mwenda ahabonero ahahahasa haati Kurisito aloma n'abita mu ese. Muhimanye muuti Kurisito simunafu aye ali n'amaani ag'ohubahangafula. ⁴ Wayire sigalaga ati w'amaani ni baali ni bamuhomerera hu musalabba, aye olw'amaani ga Hatonda njahani

* **13:1** 13:1 Mag 17:6; 19:15

mulamu. Hwesi mu ye Hatonda atunja amaani ohubaholamo omulimu gugwe wayire abandi baloma mbo huli banafu mu malomere.

⁵ Hiisi muutu gehebere omwene abone hanye ahiiri mu hufugiirira. Simumanyire muuti Yesu Kurisito ali mu enywe? Ohutusaho nga mwenda hwendulinga! ⁶ Suubira ti muja huhifaania muuti efe ng'abahwenda abatuufu aba Kurisito, sibituhayanga. ⁷ Husaba Hatonda abayeede muleheyo ohuhola ebibi, silwa hwenda huboneha oti hwabaholamo omulimo omulani, aye enywe muhole ebirani, ng'olu hiboneha oti efe hwalemererwa. ⁸ Hiri hiityo olwohuba sihunanga huhola ehiitu ehihingirira Amanuliro Amalani, ohutusaho ohubona huuti hugasoolerera. ⁹ Husangaala ni batubona baati huli banafu aye enywe ni muli bagumu mu hufugiirira. Olw'ehyo hubasabira mube badimamu. ¹⁰ Hino nj'ehigima ni mba ni tali ni nenywe mbanandiihira ni mbaloma ebiiitu bino, ko hibe ti ni nijire eyo taba w'ehabyo ni tambisa obuñangi obu Musengwa gaapa ohubayeeda, sosi hubasihiirisa.

Obuheese

¹¹ Aboluganda, ni keneresa mweraba. Mufube ohuba badimamu mu hufugiirira, mute omwoyo hu bimbalomire, muholenga hirala, mumenye mu miyaaya n'abahyenywe era Hatonda atulaga ohwenda era atunja emiyaaya, anaabenga ni nenywe.

¹² Hiisi muutu aheese owahye mu keesa ey'abaatu abagwalaafu. ¹³ Abafugiirira Kurisito abeenno bosibosi babahehiise.

14 Ehisa hya Musengwa Yesu Kurisito n'ohwenda hwa Hatonda, n'obulala ow'Omwoyo Omutukuvu, bibenga ni nenywe mwesimwesi.

Endagaano Epyaha mu Lunyole
Nyole: Endagaano Epyaha mu Lunyole (Bible)

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

e00787cd-838f-597a-9477-00b97e4e2cff